

PAPER DETAILS

TITLE: USLÛBA PESNÊ PÊXEMBER DI MEWLÛDA YEKEM A KURDÎ DE

AUTHORS: Türkan TOSUN

PAGES: 1507-1523

ORIGINAL PDF URL: <https://dergipark.org.tr/tr/download/article-file/907062>

USLÛBA PESNÊ PÊXEMBER DI MEWLÛDA YEKEM A KURDÎ DE

Türkan Tosun*

Kurte

Di vê xebatê de behsa yekem mewlûda kurdî (kurmançî) Mewlûda Mele Huseynê Bateyî hatiye kirin. Mewlûda Bateyî di nav kurdan de gelek navdar e ku di medreseyan de piştî Qûr'anê zarok hînê mewlûda wî dibin û ev berhem ji bo mewlûdnameyên din jî bûye çavkaniyeke sereke. Ji bilî vê ev mewlûd di şîn û şahîyan de tê xwendin, ji ber vê di nav kurdan de berhemeke pir girîng e.

Di vê mewlûdê de Melayê Bateyî gelo çawa pesnê Pêxember daye, şêwazeke çawa bi kar anîye, kîjan rê û rêbaz û hunerên edebî bi kar anîye, bi zimanekî çawa nivîsandiye em li dû bersiva van pirsan ketin. Di gotarê de ewil pênaseya peyva mewlûdê hat kirin û dû re der barê kevneşopiya mewlûdê, jiyan û berhemên Bateyî de agahî hatin dayîn. Naveroka mewlûdê çi ye, Bateyî çawa behsa Pêxember kiriye, rêbazeke çawa bi kar anîye em li ser van mijaran sekinîn.

Peyvên Sereke: Mewlûda Bateyî, Mele Huseynê Bateyî, Mewlûda kurdî, Pesnê pêxember, Edebiyata klasîk a kurdî, Mewlûd

THE STYLE OF PRAISING TO PROPHET IN THE FIRST KURDISH MAWLID

Abstract

This paper reviews the earliest Kurmanji-Kurdish *mawlid* written by Mullah Huseynê Bateyi. The *Mawlid* of Bateyi is very popular among the Kurds as children used to read it in madrasahs after learning how to read the Qur'an. Having served as a source for subsequent *mawlids*, Bateyi's *Mawlid* is recited in special occasions such as celebrations and mournings.

This study first provides a definition of the word *mawlid*. Then, it goes into a brief presentation of the life and work of Bateyi. Finally, this paper analyzes Bateyi's *Mawlid* with a particular attention to the following questions: how does Melayê Bateyi praise the Prophet in his *Mawlid*? What kind of a literary style does he use? What methods and literary arts does he employ? What kind of a linguistic style does he use in penning his work?

Article Types / Makale Türü: Research Article / Araştırma Makalesi

Received / Makale Geliş Tarihi:22.10.2019, Accepted / Kabul Tarihi: 27.12.2019

Doi: 10.26791/sarkiat.636128

* Türkan Tosun, Xwendekara Doktorayê, Zanîngeha Bîngolê, Beşa Ziman û Edebiyata Kurdî tosunturkan@gmail.com

ORCID ID: <https://orcid.org/0000-0002-3815-262X>

Keywords: Mullah Huseyni Bateyi, Bateyi's mawlid, Kurdish mawlid, Praising the Prophet, Classical Kurdish Literature, Mawlid

DESTPÊK

Ayeteke Qur'ana Pîroz dibêje “Me tu tenê ji bo hemû mirovan wek mizgînîdêr û hişyarker şand. Lê piraniya mirovan nizanin”¹. Wek di vê ayetê û gelek ayetên din de jî tê gotin Hz. Mihemed qasidê Xwedê ye û ji bo mirovan hatiye şandin ku ji wan re bibe rêber. Mirovên ku bûne misilman û rêberiya wî qebûl kirine him bi ayetan, him jî bi sunet û hedîsan ve Hz. Mihemed şopandine û bi hezkirin pesnê wî dane. Hin alim û nivîskarên misilman xwestine bi nivîsê pesnê xwe bidin nîşan, ji ber vê jî dest avêtine qelemê û berhemên pesnê Hz. Pêxember didin nivîsandine ku ji wan re dibêjin mewlûd. Alim û nivîskarên kurd jî helbet di vê qadê de hunera xwe nîşan dane. Li gor agahiyên berdest di nav kurdan da kesê ku ewil ev cure berhem nivîsandiye Mela Huseynê Bateyî ye. Paşê hin kesên din çav dane wî û mewlûd nivîsandine ku me navê wan kesan û mewlûdên wan li jêrê rêz kir.

Gelo Bateyî mewlûdek çawa nivîsandiye, pesnê pêxember çawa daye, me hewl da ku em di vê xebatê de mewlûda wî ya navdar binirxînin. Li ser jiyan, berhem û mewlûda wî helbet gelek tişt hatine gotin û nivîsandin, lê me xwest li ser vê mijarê em jî çend tiştan zêde bikin.

1. Têgeha Mewlûdê, Jiyan û Berhemên Mela Huseynê Bateyî

1. 2. Têgeha Mewlûdê

Di edebiyata klasîk a kurdî de mewlûd cureyek girîng e ku bi şiklê menzûm an jî pexşan ji dayikbûnê bigre heta mirinê behsa jiyanê Hz. Mihemed (s.x.l) dike. Mewlûd peyveke erebî ye û koka wî ji tîpên “v, l, d” (ولد) tê.² Ev peyva ku ji peyva “weladet”ê hatiye çêkirin tê çend meneyan ku yek ji wan “jidayikbûn”, yek “cîhê jidayikbûnê” û ya din jî “dîroka jidayikbûnê” ye. Di mewlûdê de gelemperî behsa jidayikbûna pêxember (welâdet), pêxemberiya wî (risalet), jiyan û exlaqê wî, şerên ku kirine, mîrac, mucîzeyên wî, ji Mekkeyê çûyîna wî ya ber bi Medîneyê (hicret) û wefata wî (rihlet) tê kirin.³ Di nav gelek civakên misilman de mewlûd nivîsandin, xwendin û wek seremonî pîrozkirin ji berê va heye û wek kevneşopî dewam dike.

Li gor agahiyên berdest berhemên wek mewlûd tîn hesibandin û pîrozkirina mewlûdê ewil di nav ereban de dest pê kiriye, paşê di nav civakên din ên misilman de belav bûye. Di alema îslamê da berhema ewil a wek mewlûd tê zanîn berhema Ebu'l-Ferec el-Cevzî ya bi nave “Mewlûdû'n-Nebî” ye. Piştî wê berhemên Ebu'l-Qasim es-Sebtî, Îbn Dîhye, Zemlakanî jî di nav mewlûdên ewil da dikarin bîr nîşandan.⁴

Kesên ku mewlûd nivîsandine yêrê erebî ji xwe re kirine jêderk û li gor van bi zimanê xwe yê dayikê mewlûd amade kirine. Di nav demê de mewlûd ji bilî nivîsandin û

¹ Sebe 34/28.

² Rabia Doğru, “Kara Vâiz ve Mevlid'i”, *Ondokuz Mayıs Üniversitesi İlahiyat Fakültesi Dergisi* 0/39 (2015): 222.

³ Ramazan Ekinci, “Behîştî Mahlaslı Şairlere Ait Mevlitler, Behîştî Ahmed Sinan'ın Mevlid-i Şerîfî”, *Suî Araştırmaları Dergisi* 5/10 (Yaz 2014): 17.

⁴ Süleyman Eroğlu, “Edebî Bir Tür Olarak Mevlitler-Şekil Özelliklerine Göre Bazı Değerlendirmeler”, *U.Ü. Fen Edebiyat Fakültesi Dergisi* 11/18 (2010): 126-127.

xwendinê, di salvegera jidayikbûna Hz. Pêxember de wek pîrozbahî, merasim û rîtuêl jî hatiye pîrozkirin. Helbet çawa ku di nav gel û civakên din de mewlûd hatine nivîsandin, di nav kurdan de jî ev berhem derketine holê. Qasî ku tê zanîn yekem mewlûda kurdî jî hêla Melayê Huseynê Bateyî ve di sedsala 17emîn de hatiye nivîsandin (lewra Bateyî di navbera sedsala 17-18emîn de jîyaye)⁵. Piştî Bateyî kesên din jî berhem dane û gelek mewlûdên din di edebiyata kurdî de cihê xwe girtine. Mewlûda Bateyî ya ku ji 600 beytan (ji ber destxetên cuda hejmara beytan diguhere) pêk tê⁶ jî bo mewlûdên din bûye jêderk û tesîra wê li ser mewlûdên din çêbûye⁷. Her çiqas piştî vê berhemê gelek mewlûd hatibin nivîsandin jî, qasî mewlûda Bateyî ew navdar nebûne û derneketine pêş. Piştî Bateyî hin mewlûdên kurdî yên ku hatine nivîsandin jê hinek ev in;

Mewlûdên ku bi kurmancî hatine nivîsandin

Mewlûda Bateyî: Mela Huseynê Bateyî

Mewlûdî Nebî: Şêx Muhemmed Emînê Heyderî

Mewlûda Şerîf: M. Zahit Kardeşlik

Fêkiyê Narencî Mewlûda Kurmancî: Ehmed Nas

Mewlûda Şerîf: Mela Muhemmed Elî Fudeylî

Mewlûda Nebî: Mela Şewqî Xak

Mewlûda Pêxember: Mela Silêman Kurşun

Mewlûda Kurdî Bi Şêwaza Hedbî: M. Burhan el-Hedbî

Mewlûda Fexrê ‘Alemê Muhemmed: Seyîd Mela Ebdurrehman Kurê Mela Hemze

Ava Heyat: Mela Elî bîn es-Seyid ‘Evdirehman

⁵ M. Xalid Sadinî, *Mela Huseynê Bateyî Jiyan, Berhem û Helbestên Wî*, Çapa Yekem (Stenbol: Weşanên Nûbihar, 2010), 4.

⁶ M. Xalid Sadinî, “Mela Huseynê Bateyî, Jiyan û Berhemên Wî”, *Uluslararası Beytüşşebap Ve Molla Hüseyin Bateyî Sempozyumu (Şırnak, 20-21 Eylül 2014)*, ed. İbrahim Baz (İstanbul: Şırnak Üniversitesi Yayınları, 2015), 99.

⁷ Kesên ku bixwazin tesîra Bateyî li ser mewlûdên din bibînin dikarin destpêk, neqerat, ziman, şêwaz û naveroka mewlûdên din binêrin. Çend hevokên ji du mewlûdan (mewlûdên Süleyman Kurşun û Mela Eliyê Baqustanî) li vir dikarin ji bo mînakê bînin nîşandan. Bateyî dibêje;

“Merheba ey sîrrê furqan merheba

Merheba dermanê derdan merheba”

Mele Süleyman Kurşun jî wek Bateyî peyva merhebaya bi kar aniye;

“Merhaba ey ‘ebdê Salih xweş were

Merhaba derdê dila ra dawer e”

Melayê Bateyî di neqerata (dîsgotin) mewlûda xwe de dibêje;

Ger divêtin hûn ji narî binnecat

Bi eşq û şewqek hûn bibêjin es-selat

Mela Eliyê Baqustanî jî di mewlûda xwe de wiha dibêje;

“Ger dixwazin hûn xelabin ji ‘ezab

Din selata ser Muhemmed bê hesab”

Ji bo berawirdiya Mewlûda Melayê Bateyî û Süleyman Kurşun gotara Hasan Karacan û Nurettin Aykut a bi navê “Mele Hüseyin Bateyî’nin Mewlid-i Nebî Adlı Eseri İle Mele Süleyman Kurşun’un Mewlûda Pêxember Adlı Eserinin Karşılaştırılması” dikare bê xwendin. Ji bo mînakê din a me nîşan da jî pirtûka “Mewlûda Mela Eliyê Baqustanî- Metn û Lêkolîn” dikare bê xwendin. Ev makale û pirtûk di çavkaniyê da hatin nîşandan.

Mewlûda Şerîf Ji Ewwel Heta Axir Rêberê Xelasê: M. Mustefa yê Mela ‘Aliyê Ezdarî

Kitêba Dura Birîncî Mewlûda Kurmancî: Mela Muhemmed Siraceddînê kurê Ebdilhekîmê Xelîfî

Mewlûda Kurdî Bi Zimanê Gundî: Seyîd Bedreddîn Ibn Mela Salih El-Hesenê Şefî’î El-Kefsurî

Nezma Şerîn Der Mewlûd û Sîreta Resulê Emîn: Mela Muhemmed kurê Mele Ehmedê Xursî

Mewlûdên ku bi kirdkî (zazakî-dimilkî) hatine nivîsandin

Mewlûdê Nebiyê Qûreyşî: Ehmedê Xasê

Biyîşê Pêxemberî: Osman Efendiyo Babij

Mewlûdî Pêxemberî: Mela Mehemed Elî Hûnî

Mewlûdî Nebî: Mela Kamilê Puexî

Mewlûdî Zazakî: Mela Mehemedê Muradan⁸

Mewlûdên bi soranî-hewramî hatine nivîsandin

Mewlûdname: Şêx Huseyn Qazî

Mewlûda Pîremêrd: Pîremêrd

Mewlûd: Mehemed Emîn Beledî Şinewî

Mewlûd: Mamosta Mehemed Qadî Xidrî Eşnewîye

Mewlûd: Mamosta mela ‘Ebdulkerîm Muderrîs

Mewlûd: Mamosta Mela ‘Umer Nûrbextî Neqde

Mewlûd: Mamosta Celî Zade

Mewlûd: Kak Ehmed Muftîzade

Mewlûda Mûfessel: Mamosta Mela Hadî Efxemzade

Mewlûda Muxteser: Mamosta Mela Hadî Efxemzade

Mewlûdname ê Kûkerdnewe: Mamosta Mela Muhemedê Şelmaşî

Mewlûdnamew Pêxemberî: Şêx Nesîm Texteyî

Mewlûd: Mamosta Rehman Huseyînzade

Mewlûdnamey Kurdî: Reşad Mehemed Miftî

Mewlûdname ê New Eser Ya Tarîxê Pexember: Şêx Mûhemmed Xal

Mewlûda Seyyid Muhemmed Şemsê Qureyşî: Seyyid Muhemmed Behaeddîn Şems Qureyşî

Mewlûdên bi goranî hatine nivîsandin

⁸ Zîver Îlhan, *Mewlûda Mela Huseynê Bateyî Metnê Rexneyî û Lêkolîn*, Çapa Yekem (Stenbol: Weşanxaneya Avaesta, 2016), 16-17.

Mewlûdnamew Pêxemberî: Seyyid ‘Ebdullahê Weblberî⁹

Wek xebatên din ên kurdolojiyê li ser mewlûdan jî her ku diçe lêkolînên xurt tên kirin û agahiyên nû li ser van xebatan zêde dibin. Ji bilî vê listeya ku me da mewlûdên din jî hene. Zahîr Ertekîn û Nurettîn Ertekîn di gotarekê de behsa kurtedîroka mewlûdan kirine, balê kişandine li ser hejmara mewlûdan û li gor kronolojiyê tabloyeke ku navê 60 mewlûdên kurdî (zazakî, kurmancî, soranî-hewramî û goranî) tê de hene amade kirine.¹⁰

2. Jîyan û Berhemên Mela Huseynê Bateyî

2. 1. Kurtejiyana wî

Mela Huseynê Bateyî di edebiyata klasîk de navekî pir girîng e. Di dewra ku jiya ye de wek helbestvan û seydayekî kurd kesekî navdar bûye, lê piştî miriye nav û dengê wî zêdetir belav bûye. Der barê nav û jiyanê wî de hin nîqaş hene ku tê gotin navê wî Ehmed, Mihemed an Huseynê Ertûşî ye, lê M. Xalid Sadînî bi çend xal û delîlan ve nîşan dide ku navê wî Huseyn e.¹¹ Ji bo serdema jiya ye jî nakokî zêde ne, lê Sadînî piştî gelek çavkanî, şîrove û nirxandinan der barê vê mijarê de jî dibêje ew di sala 1680an de hatiye dinyayê û 1760an de wefat kiriye.¹²

Mela Huseynê Bateyî li gundê Bateyê ya ku dikeve rojhilatê Beytuşşebabê (Elke) di nav eşîra Ertûşîyan de hatiye dinyayê, bavê wî Mele Mistefa ye.¹³ Heta 15 saliya xwe li cem birayê xwe Ehmed ê ku li gundê Pîrûsiyan mele bû xwendiyê û paşê li Medreseya Mîr Zeynel Begê Hekarî perwerde dîtiye. Ji bilî kurdî erebî, farisî û tirkî jî zanibûye.¹⁴ Mela Bateyî piştî xendina wî xilas bûye li gundê Pîrosa nêzîkî Bateyê dest bi melatîyê dike, li wir bi Hemayîl Xanimê re dizewice û dibe xwedî zarokan.¹⁵ Du qîz û kurekî wî çêbûne ku navê zarokên wî Tahir, Zulfê û Asmîn e.¹⁶

2. 2. Berhemên Wî

Berhemên Mela Huseynê Bateyî qasî ku hatine bi dest xistin ev in; *Mewlûda Nebî*, berhemeke pexşan a bi navê *Hemal* (bi erebî hatiye nivîsandin) û bi qasî dîwançeyekê helbestên cur be cur (munacaat, ne’et û evînî). Li gor Qanatê Kurdo manzûmeya evînî *Zembîlfiroş* jî berhema wî ye,¹⁷ lê li ser vê berhemê fikreke hevpar tune. Lewra Xalid Sadînî behsa vê berhema Bateyî nake.¹⁸

⁹ M. Zahir Ertekin-Nurettin Ertekin, “Kurtedîroka Mewlûdnameyên Kurdî”, *Şarkiyat ICSS’17 Uluslararası Sosyal Bilimler Kongresi/International Congress of Social Science*, (Diyarbakır, 14-17 Eylûl 2017) ed. Mehmet Bilen (Diyarbakır: Şarkiyat Vakfı, 2017), 152-153-154.

¹⁰ Ertekin, “Kurtedîroka Mewlûdnameyên Kurdî”, 152-153-154.

¹¹ Sadînî, *Mela Huseynê Bateyî Jiyan, Berhem û Helbestên Wî*, 19-20.

¹² Sadînî, *Mela Huseynê Bateyî Jiyan, Berhem û Helbestên Wî*, 30.

¹³ Abdurrahman Adak, “Destnivîsên Mewlûda Melayê Bateyî Di Arşîva A. Jaba De: Nasandin û Analîz”, *The Journal Of Mesopotamian Studies* 2/2, (Havîn: 2017): 4.

¹⁴ Sadînî, *Mela Huseynê Bateyî Jiyan, Berhem û Helbestên Wî*, 30.

¹⁵ Abdurrahman Adak, *Destpêka Edebiyata Kurdî Ya Klasîk*, Çapa 3yemîn (Stenbol: Weşanên Nûbihar, 2015), 275.

¹⁶ Sadînî, *Mela Huseynê Bateyî Jiyan, Berhem û Helbestên Wî*, 31.

¹⁷ Qanatê Kurdo, *Tarîxa Edebiyata Kurdî*, Çapa Yekem (Diyarbakır: Weşanên Lîs, 2010), 84-85.

¹⁸ Xalid Sadînî di pirtûka xwe da behsa vê berhemê nake. Ez ji bo ku emîn bibim, min rasterast ji şexsê wî pirsî, lê got ji ber ku gotinên Qanatê Kurdo bêdelîl in wî behsa vê mijarê nekiriye.

3. Mewlûda Nebî û Naveroka Wê

Mewlûda Huseynê Bateyî di nav kurdan de mewlûdeke bi nav û deng e, di medreseyan kurdan, şîn û şahiyên wan de tê xwendin. Ev mewlûd di nav gelê kurd de bûye berhemeke girîng û bi saya wê hezkirina Hz. Pexember zêde bûye. Der barê beş, rûpel û beytên mewlûdê de agahiyên cuda li holê hene, sedema vê jî nusxayên cuda ne. Ya ku me li ser xebat kir nuxxaya M. Xalid Sadinî çap kiriye ye. Ev mewlûd ji 18 beşan û 600 beytan pêk tê. Melayê Betayê di vê berhemê de bi zimanekî zelal û xurt ji afirandina Adem Pêxember bigre heta jidayikbûna Hz. Mihemed behsa wî kiriye, bi hezkirin û heyranî pesnê wî daye.

Li gor nûsxeya li ber destê me Melayê Bateyê mewlûda xwe bi tevî paşgotinê wek 18 beş amade kiriye. Hin beş kin, hinek normal û hinek jî dirêj in. Beşên mewlûdê gelemperi di navbera 11 û 40 beytan de hatine nivîsandin, lê jê hinek dirêj in wek beşa “Hatina Helîma se’dî bo Mekkehê û birina Pêxemberî” (58 beyt) û “Pêxember li nav ûcaxa se’diyan” (68 beyt). Li ser beşan nav hatine nivîsandin û di dawiya wan de neqerat (dîsgotin) hene. Mewlûd ji van beşan pêk tê;

1- Hemd bo Xwedê, 2- Selat ji bo Pêxember, 3- Xêra xwendina mewlidê, 4- Afirandina ronahiya Pêxember, 5- Afirandina Adem Pêxember, 6- Neseba Pêxember, 7- Bûna ‘Ebdullah û geheştina ronahiya bo wî, 8- Bergeryana Cihûyan da ‘Ebdullah bikujin, 9- Zewaca ‘Ebdullahê û Amîneyê, 10- Giraniya Amîneyê bi Pêxember, 11- Bûna Pêxember, 12- Ew tiştên li şeva bûnê çêbûne, 13- Ew nîşanên ‘Ebdulmuttelib di wê rojê de dîtin, 14- Hatina Helîma se’dî bo Mekkehê û birina Pêxemberî, 15- Zivirîna karwanê se’diyan ji Mekkehê, 16- Pêxember li nav ûcaxa se’diyan, 17- Zivirîna Pêxemberî li Mekkehê, 18- Paşgotin¹⁹

Mewlûda Bateyî wek ku hat gotin bi varyasyonên cuda hatine çapkirin, ji ber vê jî di hinekan de navê hin beşan an diguherin, an jî tune ne. Lê gelemperî wek beşên ku me rêzêkirin derdikevin pêşberî me. Her beş di nav xwe de ji gelek beytan pêk tê. Ev beyt di dawiya hemû beşan de wek neqerat (dîsgotin) hatiye nivîsandin;

Ger divêtin hûn ji narî binnecat

Bi eşq û şewqek hûn bibêjin es-selat

Ji bilî beşa “Bûna Pêxember” ev di dawiya beşan de hatiye nivîsandin, lê bi tenê di vê beşê de him navîna beşê û him jî di dawiya beşê de hatiye dubarekirin. Ji ber vê bi tevahî di mewlûdê de ev neqerat 19 caran hatiye dubarekirin. Naveroka beşan wiha ye;

1- Hemd bo Xwedê: Ev beşa ewil ya bi hemd û şikra Xwedê ve dest pê dike ji 11 beytan pêk tê. Di vê beşê de behsa mezinbûna Xwedê tê kirin û hin sîfatên wî tên rêzêkirin.

2- Selat ji bo Pêxember: Ji 13 beytan pêk tê û di vê beşê da selat û selam ji bo Hz. Mihemed (s.x.l.) tê kirin.

3- Xêra xwendina mewlidê: Di vê beşa sêyemîn de behsa xêr û fezîletên xwendina mewlûdê hatiye kirin. Ev beş ji 21 beytan pêk tê. Tê gotin di mala ku mewlûd tê de bê xwendin ji qeza û belayan dûr dibe, pereyê ku ji bo mewlûdê tê xerckirin jî ji bo însanan bibereket û xêr e.

¹⁹ Navê beşan di pirtûka M. Xalid Sadinî de çawa hatibe nivîsandin, me jî li gor wê nivîsand.

4- Afirandina ronahiya Pêxember: Ev beşa ku ji 33 beytan pêk tê behsa afirandina ronahiya Hz. Mihemed (s.a.v.), afirandina kaînatê dike. Dîsa di vê beşê de behsa ummeta Hz. Mihemed tê kirin û tê gotin ew ji ummetên din zêde ne û bi qîmettir in.

5- Afirandina Adem Pêxember: Wek ku ji navê wê jî tê fêmkirin di vê beşê de behsa xuliqandina Hz. Adem, li ber wî secdekirina milyaketan tê kirin. Ji 39 beytan pêk tê.

6- Neseba Pêxember: Di vê beşê de 11 beyt hene. Tê de behsa navê şecereya Hz. Mihemed tê kirin û pesnê esl û neslê wî tê dayîn.

7- Bûna ‘Ebdullah û geheştina ronahiya bo wî: Ev beş ji 35 beytan pêk tê, di vê beşê de behsa jidayîkbûna Ebdullahê bavê Hz. Pêxember tê kirin.

8- Bergeryana cihûyan da ‘Ebdullah bikujin: Ji 20 beytan pêk tê. Melayê Bateyî di vê beşê de behsa cihûyan dek û dolabên wan ên ji bo kuştina Ebdullahê bavê Hz. Pêxember dike.

9- Zewaca ‘Ebdullahî û Amîneyê: Bateyî di vê beşê de 50 beyt nivîsandine û behsa zewac û dewata Ebdullahê bavê Hz. Pêxember û diya wî Amîneyê kiriye.

10- Giraniya Amîneyê bi Pêxember: Ev beş ji 25 beytan pêk tê. Giraniya Amîneyê ya bi Hz. Pêxember her meh mizgîniya ku ji wê re tê dayîn ku ewê pêxemberekî bîne dinyayê di vê beşê de mijar in.

11- Bûna Pêxember: Beşa ku behsa jidayîkbûna Hz. Mihemed dike ev beş e û ji 49 beytan pêk tê. Dema ew tê dinyayê hin bûyer diqewimin ku ew jî wek mijar di vê beşê de cih digrin.

12- Ew tiştên li şeva bûnê çêbûne: Roja ku Hz. Pêxember tê dinyayê hin mucîze çêdibin ku Melayê Bateyî di vê beşê de bi 18 beytan ve behsa wan mucîzeyan kiriye.

13- Ew nîşanên ‘Ebdulmuttelib di wê rojê de dîtin: Ev beş ji 21 beytan pêk tê. axaftina Ebdulmuttelibê kalikê Hz. Mihemed a bi dayika wê Amîneyê ra, bûyerên ku dema ew tê dinyayê diqewimin di vê beşê de tên behskirin.

14- Hatina Helîma Se’dî bo Mekkehê û birina Pêxemberî: 58 beytên vê beşê behsa Helîmeya Se’dî ya ku şîr daye Hz. Pêxember dike. Ew çawa tê Mekkeyê, çawa Hz. Mihemed dibe ku xwedî bike û bimijîne li vir tê behskirin.

15- Zivirîna karwanê se’diyan ji Mekkehê: Ji 25 beytan pêk tê ev beş û behsa vegera karwana Sa’diyan a Mekkeyê dike.

16- Pêxember li nav ûcaxa se’diyan: Dema Helîmeya Sa’diyan Hz. Pêxember dibe nav êl û eşîra xwe bereketa wî li ser wê eşîr û axê çêdibe. Ev beş ji 68 beytan pêk tê, Melayê Bateyî li vir behsa bereketa Pêxember ya ku derketiye holê dike. Melayê Bateyî behsa vê bereketa çêbûye dike. Dibêje bi hatina wî ve heywanan zêde şîr dane, erd bi bereket bûye û h.w.d.

17- Zivirîna Pêxemberî li Mekkehê: Ev beş ji 49 beytan pêk tê. Li vir tê gotin Helîme Hz. Mihemed dibe Mekkeyê û paşê behsa vegera wî ya ji Mekkeyê tê kirin.

18- Paşgotin: Mewlûd li vir dawî dibe û ev beşa encamê ye. Ji 25 beytan pêk tê û tê de behsa sîfatên Hz. Mihemed tên kirin.²⁰

3.1. Wezna Mewlûdê

Mewlûda Bateyî bi awayekî menzûm bi wezna arûzê, qaliba fâ'ilâtûn/fâ'ilâtûn/fâ'ilûn hatiye nivîsandin. Çavkaniya wezna arûzê edebiyata ereban e ku di risteyan de li gor dirêjahî û kinbûna kêteyan tê tespîtîkirin. Divê her riste ji hêla deng va wek hevdu bin. Kîteya bi tîpek dengdêr va qediyaye "kîteya vekirî" ya ku bi tîpeke dengdar va qediyaye jî "kîteya girtî" ye. Kîteyên vekirî bi sembola xalê (.) û yê girtî jî bi xêzeke kin (-) tên nîşandan. Ev cure wezn di berhemên klasîk de tê bikaranîn û mewlûd jî bi vê weznê ve hatiye nivîsandin. Mînak;

Ew Xwedayê malikê mulkê 'ezîm

Daye me mîrîsa Qur'ana Kerîm²¹

3.2. Zimanê Mewlûdê

Mela Huseynê Bateyî yekem kes e ku bi zimanê kurdî mewlûdek nivîsandiye. Ev taybetmendî bûye sedem ku di nav kurdan da qîmeta mewlûdê zêde bibe. Her çiqas mewlûd kurdî (kurmançî) bê nivîsandin jî, hin caran di bin tesîra zimanê erebî û farisî de maye. Mirov gelemperî binirxîne di mewlûdê de serdestiya kurdî heye. Peyv û gotinên kurdî yê resen bi awayekî rewan di berhemê de hatine bikaranîn. Ji bo ku zimanê kurdî di mewlûdê de çawa hatiye bikaranîn û zelalbûna wê bê dîtin mirov dikare gelek hevokan mînak nîşan bide, lê me ev beyt dan;

Paşî hingî xaliqê her sûretê

Çêkirî Adem bi destê qûdretê

Pif kirî ruha xwe ew bû nazenîn

Lew melek hatin ji bo wî sacidin²²

Wek ku tê dîtin gelemperî peyv kurdî ne, zimanekî zela di mewlûdê da heye. Lê wek ku li jorê jî hat gotin tesîra erebî li ser mewlûdê zêde ye û ji bo vê mijarê ev beyt dikare bibe mînak;

Ewwela Lefza wî min maye li bîr

Gotî wî: Allahû ekber min kebîr²³

Di vê beyta Melayê Bateyî de peyvên erebî "ewwel, lefz, Allah, ekber, kebîr" xwe didin nîşandan.

Ji bilî erebî peyvên farisî jî di mewlûda Melayê Huseynê Bateyî de hene ku wek;

Xweş divê babê ezîzê maderî

²⁰ Hasan Karacan-Nurettin Aykut, "Mele Hüseyin Bateyî'nin Mewlid-i Nebî Adlı Eseri İle Mele Süleyman Kuşun'un Mewlida Pêxember Adlı Eserinin Karşılaştırılması", *Bingöl Üniversitesi Yaşayan Diller Enstitüsü Dergisi* 1/2, (Kasım: 2015): 124.

²¹ Sadinî, *Mela Huseynê Bateyî Jiyan, Berhem û Helbestên Wî*, 175.

²² Sadinî, *Mela Huseynê Bateyî Jiyan, Berhem û Helbestên Wî*, 184.

²³ Sadinî, *Mela Huseynê Bateyî Jiyan, Berhem û Helbestên Wî*, 221.

Rohniya malê û zîba esmerî²⁴

Di ve beytê de jî peyvên “mader” û “zîba” peyvên farisî ne ku Bateyî ew bi kar anîne.

3.3. Uslûba Mewlûdê

Berhemeke edebî dema tê xwendin, behsa wê tê kirin an jî li ser lêkolînên tînin kirin hin taybetmendî û pîrs derdikevin pêş. Gelo nivîskarê wê kî ye, berhem kingê hatiye nivîsandin, ziman û şewaza wê çawa ye, bi kîjan metoden ve hatiye nivîsandin? Dema em bibêjin uslûb, şewaz divê çi bê fêmkirin niha em hinekî li ser vê rawestin.

Uslûb peyveke erebî ye û meneya wê vegotin, îfade, tarz û rêbaza kirinê ye.²⁵ Ji hêla edebî ve jî taybetmendiya vegotin û nivîsandina kesekî ye. Bi hevokan, bi şiklê nivîsandinê, bi peyv û gotinên hatine bikaranîn, bi metoda nivîsandinê, metafor, sembol, maxlas û tiştên bi vî rengî ve şewaza nivîskar nîşan dide. Wek neynikekî xususiyetên wî yê nivîsandinê, şopên kesayetiya wî, binhişê wî, alema wî ya hundirîn, ziman, hest, hiş û ramanên wî dide der. Yê ku berhemekê dixwînin ji ber van xusiyetan texmîn dikin nivîskarê wê berhemê kî ye, ew berhem kingê hatiye nivîsandin, nivîskar girêdayî kîjan êkolê ye û h.w.d.

Him di edebiyata klasîk û him jî ya modern de her şair û nivîskar xwedî uslûbekê ye, li gor vê uslûba xwe dinivîse, ber û berhemên xwe pêşkeşî xwîneran dike. Emê niha hinekî behsa uslûbê ango şewaza Melayê Bateyî bikin ka wî mewlûd bi şewazeke çawa nivîsandiyê. Melayê Bateyî helbestvanekî edebiyata klasîk e. Ji ber ku serdema jiyayê zimanên erebî û farisî serdest bûn, wî jî ev ziman di berhemên xwe de zêde bi kar anîne. Lê Bateyî gaveke mezin avêtiye ku ev gava wî cudahiye dike navbera wî û helbestvanên wê demê. Ev cudahî jî ew e ku wî bi zimanê xwe, yanê bi kurdî mewlûdek nivîsandiyê, ev xaleke pir girîng e. Di mewlûdê de Bateyî ewil ji bo Xwedê hemd û paşê selata ji bo Hz. Mihemed dest bi mewlûda xwe dike;

“Hemdê bêhed bo Xudayê ‘alemîn

Ew Xudayê daye me dînê mubîn

Em kirine Ummeta Xeyru’l-Beşer

Tabî’ê wî muqtedayê nam(i)wer”²⁶

Di dawiyê de ji bo hemû misilmanan diayan ji Xwedê dike. Herî dawîn dixwaze kesên ku mewlûdê dixwînin ji bo wî Fatihayekê bixwînin. Çend rêzikên pesnê pêxember didin heke bînin nîşandan mirov dikare van hevokan mînak bide;

Bû wekî durra sipî wê seetê

Xewe da der cuyibarê Cennet²⁷

²⁴ Sadînî, *Mela Huseynê Bateyî Jiyan, Berhem û Helbestên Wî*, 190.

²⁵ Türk Dil Kurumu, “Türk Dil Kurumu Sözlükleri” Pêgehîn: 22yê Adarê 2018.
<https://sozluk.gov.tr/?kelime>

²⁶ Sadînî, *Mela Huseynê Bateyî Jiyan, Berhem û Helbestên Wî*, 175.

²⁷ Sadînî, *Mela Huseynê Bateyî Jiyan, Berhem û Helbestên Wî*, 184.

Ew Hebîbê rohnîya heft asîman
Herdu ‘alem qalib, ew rûh û rewan²⁸

De çi bêjim ne’ tê zatê enwerî
Ê ku ‘alem cumle bo wî çêkirî²⁹

Wek ku tê dîtin Bateyî Hz. Mihemed dişibîne durra spî ku ew pir biqîmet e, wî dişibîne ronahiya heft asîmanan, ji bo şexsê wî dibêje ew rûh û rewan e û alem ji bo wî hatiye çêkirin. Dema serî heta dawiyê bê xwendin wê bê dîtin ku pesin û mezinkirineke çawa dewlemend di tevahiya mewlûdê de heyê.

Melayê Bateyî di mewlûda xwe de behsa îradeya mutlaq a Xwedê, xuliqandina alemê, wesfên Hz. Mihemed, xususiyetên wî yên ji însanên din cudatir in, meqama pêxembertiyê û mijarên din dike. Di her yek beyteke xwe de peyvên xemilandî û bimene bi kar tîne. M. Zahir Ertekîn van pesn û mijaran wiha dabeş dike;

“1- Pesnên Heqîqeta Mûhemmedî. Pesnên wek ‘Ronahîya heft asîman, Xeyrul Beşer’ Sultanê Cîhan’ dikevin bin vê beşê.

2- Pesnên hezkirina Xwedê. Di ve bêşê de hezkirina Xwedê li hember Resûlê Xwedê (s.x.l), wek ‘Canê baqî, Xasê mehbûbê Celîl’ tê dîtin.

3- Pesnên girêdayê bi jîyana wî ya dinyewî û sinc û xawênên însanî. Di vê beşê de yetimbûnîya wî, wefaya wî, ‘izzeta wî, camêrtîya wî destnîşan bûye.

4- Pesnên derbarê pexembertîya wî. Pesn û medhên girêdayî bi pêxembertîya wî di vê beşê de tê dîtin. Bi taybet xesletên derbarê mezinahîya pêxemberiya wî, wek; ‘Xatemê pêxemberan, Xitmirrersûl, Ehmedê ‘Alî ‘elem, îftîxarê enbîya’ û wd.

5- Pesnên derbarê xesletên Wî yên derheqê ummetê de. Di vê beşê de bi xûy, xeslet û taybetîyên ku ummet ji Cenabê Pêxember sîd werdigire hatîye nivîsandin. Wek; ‘Şe’f’ulmuznibîn, darûyê her ‘illetê, Destegîr û mustexasê herdû kewn’³⁰

Wek ku Ertekîn jî dabeş kiriye Melayê Bateyî di gelepêriya mewlûdê de behsa van mijaran dike, lê dema pesnê Xwedê û Hz. Pêxember dide ayet, hedîs, hunerên edebî, qafiye, teswîr, sembol û gelek tiştên bi vî rengî bi kar tîne ku ev tişt der barê uslûba wî de agahiyê didin. Bateyî bi metodeke dîdaktîk (tiştê ku agahî dide, hîn dike) ve mewlûda xwe nivîsandiye. Ji ber vê ye ku kurd di medreseyan de dixwînin û wê fêrî zarokan dikin. Ji ber vê uslûba dîdaktîk, bi qafiye û rewan e ku ew zû tê jiberkirin û xwendin.

²⁸ Sadî, *Mela Huseynê Bateyî Jiyan, Berhem û Helbestên Wî*, 177.

²⁹ Sadî, *Mela Huseynê Bateyî Jiyan, Berhem û Helbestên Wî*, 209.

³⁰ M. Zahir Ertekîn, “Pesn û Wesfên Hz. Pêxember (s.x.l.) Di Mewlûda Melayê Bateyî De”, 1. *Uluslararası Zap Havzası Uleması Sempozyumu Bildirileri (Hakkari, 26-29 Nisan 2018)* ed. Yaşar Kaplan-Murat Adıyaman-Emin Yıldırım (İstanbul: Hakkari Üniversitesi Yayınları, 2018), 754.

3.3.1. Bikaranîna Ayet, Hedîs û Rîwayetan

Alim û nivîskarên misilman dema berhemek nivîsandine piştî xwe dane çavkanî û referansên dînî. Ji Qur'anê ayetan, ji pêxember hedîsan, ji çîrokên dînî û tesewufî jî meseleyan hilbijartine û ew di berhemên xwe de bi kar anîne. Ev kevneşopî di nav edebiyata klasîk a kurdî de jî reng vedaye ku mirov dikare şopên wê di mewlûda Bateyî de jî bibîne. Melayê Bateyî di mewlûda xwe de hin caran ayet, hin caran hedîs û hin caran jî bûyer û rîwayetên dînî bi kar anîne ku pesnê pêxember bide. Ev jî di mewlûda wî de şêwazek e. Mînak di Qur'ana Pîroz sureya Duhayê de dibêje “Tu êtîmekî bûyî ma wî tu dîtî û nesitirandî?”³¹ Ev ayet jî bo Bateyî dibe nexşerê û ew behsa êtîmbûna Hz. Pêxember dike. Jinên şîr didin dergûşan naxwazin derguşeke êtîm bimêjînin, lê Helîmeya Sadiyan wî qebûl dike û dimêjîne. Bateyî wiha behsa vê mijarê dike;

Gotê: “Her bîne ewî tîflê yetîm”

“Qet tewekkelna ‘elallahîl-kerîm”

Dê çî key tu ba yetîmê bê peder”

Ma Helîme damena sebrê duker

Hate çûnê kariwanî kir cihêz

Dîti Haris rohnîkê wê bûne rêz

Gotê Haris: “Ez dibînim tu xudûk”

Gotê: “Heqq e! Dê biçim ez bê buçûk”³²

Dîsa ayeteke din a ku dibêje “Saet (qiyamet) nêzîk bû, hîv bû du qetan. Ew dema mucîzeyekê dibînin rûyê xwe vedugerînin û dibêjin ev sêreke daîmî ye.”³³ Ji bilî vê hin rîwayet jî dibêjin di dema Hz. Pêxember de hîv bûye du qetan û mirovan ev bûyer dîtine. Melayê Bateyî di paşgotina mewlûdê de bal dikşîne mijara perçebûna hîvê û bi van referansan pesnê pêxember dide. Dibêje yek nêrîneke wî ve hîv bû du perçeyan.³⁴

“Ehmeda çavê te ma zaxel beser

Yek îşareta te inşeqqel qemer”³⁵

3.3.2. Hunerên Edebî yên Mewlûdê

Mela Huseynê Bateyê wek nivîskarên din ên serdema klasîk di vê mewlûda xwe de jî hunerên edebî sûd wergirtiye ku berhema wî bêtir xurt û dewlemend bibe. Di mewlûdê de hin cureyên vegotinê û hunerên edebî hatine bikaranîn, me behsa hinekan kir. Lê dibe ku ew jî yên me tespîtkirin zêdetir bin.

³¹ Duha 93/6

³² Sadîni, *Mela Huseynê Bateyî Jiyan, Berhem û Helbestên Wî*, 215.

³³ Qamer 54/ 1-2.

³⁴ Nurullah Agitoğlu, “Molla Hüseyin Bâtevî’nin Şiirlerindeki Hadisler Üzerine Bazı Değerlendirmeler”, *Uluslararası Beytüşşebap Ve Molla Hüseyin Bateyî Sempozyumu* (Şırnak, 20-21 Eylül 2014), ed. İbrahim Baz (İstanbul: Şırnak Üniversitesi Yayınları, 2015), 126.

³⁵ Sadîni, *Mela Huseynê Bateyî Jiyan, Berhem û Helbestên Wî*, 232.

3.3.2.1. Teşbîh: Ev peyva erebî ya ku di edebiyatê de wek rêbazêke hunerê tê bikaranîn tiştêkî şibandina tiştêkî dinê ye.³⁶ Melayê Bateyî di mewlûdê de gelek hunerên edebî ji bo pesn û wesfên Hz. Pexember bi kar anîye ku teşbîh jî ji wan yek e. Bi vê rêbazê ve mene xurt dibe û tahmeke edebî derdikeve holê. Bateyî hin caran Hz. Mihemed şibandiye ronahiya heft asîmanan, can û ruhê herdu aleman, hin caran jî ew şibandiye durra spî û wî wek dermanê hemû derdan terîf kiriye;

Ew Hebîbê rohnîya heft asîman

Herdu ‘alem qalib, ew rûh û rewan³⁷

3.3.2.2. Îştîqâq: Ev peyva ku koka wî erebî ye tê meneya piraştin, jê zêdebûn, ji kokekê çêbûnê. Wek têgeheke edebî peyvên ku ji heman reh û bingehe tên di hevok an jî beytekî de li cem hevdu bikaranîn e. Ji bo ku mene û deng xurt bibe, vegotineke biaheng derkeve holê tê bikaranîn.³⁸

Karîsazê bende û sultanê can

Rehîm û Rehman Latîf û Mihriban³⁹

Peyvên “rehîm” û “rehman” ên di vê beytê de derbas dibin ji tîpên erebî “r, h, m”yê tên. Yanê ev herdu peyv ji heman rehê çêbûne ku ji bo hunera îştîqâqê mînakeke baş e.

3.3.2.3. Îstîfham: Peyva îstîfhamê peyveke erebî ye û koka wî ji tîpên “f, h, m”yê tê. Meneya wê pirs e. Ji hêla edebî ve ev hunerek e, ji bo ku balê li ser gotinekê û tiştêkî bikşîne, fîkr û ramanan fêr bike pirs pirsikirin e. Gelemperî pirsên wek “kîjan, çi, kî, çima” tên pirsîn.⁴⁰ Mela Huseynê Bateyî di vê beyta mewlûdê de dibêje;

De çi bêjim ne’ tê zatê enwerî

Ê ku ‘alem cumle bo wî çêkirî⁴¹

Li vir pirs “çi” ji bo hunera îstîfhamê mînak dikare bê nîşandan. Lewra li vir her çiqas bibêje “ez çi bibêjim” û vê pirsê bike jî, di eslê xwe de dizane wê çi bibêje, bersivê di hundirê xwe de dide. Wek mene dixwaze bibêje her tişt dikare bê gotin, bi hezaran tiştên xweş û baş ji bo wî bîn gotin jî hindik e.

3.3.2.4. Tezad: Peyva tezadê peyveke erebî ye. Meneya wê dijbûn e, dijberî û nakokî ye. Ji hêla edebîyatê ve peyvên ku dijî hev in di vegotinê de bi hev re bikaranîn e.⁴²

Dohtê çakanê Qureys û hem ‘ereb

Muntezîr bûn pêkve bo wî roz û şeb⁴³

³⁶ Ethem Cebecioğlu, *Tasavvuf Terimleri ve Deyimleri Sözlüğü*, (Ankara: Ağaç Kitapevi Yayınları, 2009), 272.

³⁷ Sadinî, *Mela Huseynê Bateyî Jiyan, Berhem û Helbestên Wî*, 177.

³⁸ Bahir Selçuk, “Divan Şiirindeki Ses Ve Ahenkle İlgili Sanatlara Genel Bir Bakış”, *Adıyaman Üniversitesi Ulusal Eski Türk Edebiyatı Sempozyumu*, (Adıyaman, 15-16 Mayıs 2009), ed. Süleyman Çaldak- İbrahim Halil Tuğluk (Ankara: Adıyaman Üniversitesi Yayınları, 2010), 486.

³⁹ Sadinî, *Mela Huseynê Bateyî Jiyan, Berhem û Helbestên Wî*, 175.

⁴⁰ Kadri Yıldırım, *Ehmedê Xanî Mem û Zîn Çeviri ve Kavramsal Tahlili*, Çapa Duyemîn (Stenbol: Weşanên Avesta, 2013), 55.

⁴¹ Sadinî, *Mela Huseynê Bateyî Jiyan, Berhem û Helbestên Wî*, 209.

⁴² Türk Dil Kurumu, “Türk Dil Kurumu Sözlükleri”.

⁴³ Sadinî, *Mela Huseynê Bateyî Jiyan, Berhem û Helbestên Wî*, 190.

Wek ku tê zanîn roj û şev du tiştên dijberî hevdu ne, yek ronahî ye û ya din jî tarî ye û du wextên cuda ên rojekê ne. Helbet meneyên wan ên mecazî jî hene. Bateyî di vê beytê de peyvên “roz” û “şeb” bi kar anîye û hunera tezaadê derxistiye pêş.

3.3.2.5. Telmîh: Telmîh bi meneya xwe ya ferhengê “çirşerîsk biriqandin” e. Lê wek têgeh di îfadeyê de bi rêya temsîlê îşaretê bûyer, çîrok, ayet, hedîs baweriyên cuda û h.w.d kirin e.⁴⁴ Yanê tiştê ku dixwaze bê gotin şûna rasterast gotinê bi awayekî sergirtî û bi îma, temsîl û îşaretan yanê tiştên din ve vegotin e. Bateyî di mewlûda xwe de bi awayekî serkeftî nîşan dide ku haya wî ji ilmê îslamî heye û vê ilmê xwe di nav beytên xwe de cih dike. Mînak dema di vê beyta jêrê de behsa hin navan dike “Hewwa”, “Sara”, “Asîye” û “Meryem” em dizanin ku ew ne jinên li rêzê ne û ji Amîneya Hz. Pêxember re bûne alîkar ku ew biwelide. Ev navên ku Bateyî behsa wan dike di hemû dînen semawî de jinên navdar in, ji ber vê Bateyî bi van navan ve wan jinan refere dike.

Ew kî bûn? Hewwa û Sara Asîye

Ya li pêşim Meryema ‘Îmranî ye⁴⁵

3.3.2.6. Tekrîr: Tekrîr peyveke erebî ye û meneya wê dubarekirin, car din gotin e. Di nivîsek an jî helbestekê de ji bo mene û têgeh xurttir bibe li dû hevdu dubarekirinê re tê gotin ku ev hunereke vegotinê ye.⁴⁶ Mela Huseynê Bateyî di beşa mewlûdê ya bi serenava “Bûna Pêxember” de vê hunera vegotinê gelek caran bi kar anî ye. Peyva “merheba” di van beytan de tekrîr in;

Merheba ey şemsê taban merheba

Merheba ey canê canan merheba⁴⁷

3.3.3. Qafiye

Bi erebî “qafiye”, bi frensizî “rime” bi îngilizî jî “rhyme” di helbest û stranan de yek ji hêmana ahengê ye ku hêza wê berhemê xurt dike. Bi saya qafiyeyê ew helbest tesîrê zêdetir li ser gotinê dike. Qafiye di dawîya risteyên helbestan de tîpên ku heman dengî didin û tîpên dubarekirin in.⁴⁸ Heke berfireh bê terîfkirin mirov dikare bibêje qafiye; di serî, navîn an jî dawîya risteyan de tîp, peyv an jî dengên ku tîp dubarekirin, wek hevdu tîpên nivîsandin lê meneyên cuda didin re tê gotin.

Nîvqafiye, qafiyeya tam, qafiyeya dewlemend û qafiyeya tunç cureyên qafiyeyê ne. Mela Huseynê Bateyî hema ji serî bigre heta dawiyê mewlûda xwe bi qafiyeyê nivîsandiye, hemû cureyên qafiyeyê bi kar anîye. Şêwaza vegotina wî û qafiyeyên di mewlûdê de derbas dibin dewlemendiya uslûba wî nîşan dide.

3.3.3.1. Nîvqafiye

Di dawîya risteyan de heke dengê bişibe hevdu jê ra dibêjin nîvqafiye. Melayê Bateyî di mewlûdê de gelek caran nîvqafiye bi kar anîye. Ji bo nîvqafiyeyê ev beyt dikare mînak bê nîşandan. Tîpa “f” yê ya di peyvên dawîya risteyan de dişibin hevdu nîvqafiye ne;

⁴⁴ Ahmet Kartal, “Türk Edebiyatında Belâgat Çalışmaları Ve “Tezâd” ve “Telmîh” Sanatlarına Eleştirel Bir Bakış, *Ç.Ü. Sosyal Bilimler Enstitüsü Dergisi*, 16/1, (Haziran 2007): 418.

⁴⁵ Sadinî, *Mela Huseynê Bateyî Jiyan, Berhem û Helbestên Wî*, 204.

⁴⁶ Türk Dil Kurumu, “Türk Dil Kurumu Sözlükleri”.

⁴⁷ Sadinî, *Mela Huseynê Bateyî Jiyan, Berhem û Helbestên Wî*, 205.

⁴⁸ Erman Altun, *Türk Halk Edebiyatına Giriş*, (İstanbul: Kitabevi Yayınları, 2004), 85.

Sed hezar û hem çihar û bîst elf

Her yekî bûyek Nebiyê dil şikerf⁴⁹

3.3.3.2. Tamqafiye

Di vê cure qafiyeyê de du tîp (yek jê dengar û ya din jî dengdêr) dişibin hevdu û di nav xwe de ahengekê çêdikin. Bateyî di mewlûdê de gelek caran bi kar aniye, mînak di van risteyan de tîpên “e” û “t” di nav hev de biqafiye ne.

Go wî pêxemberê ‘alî sifet

Mewlûda min herkesê mazin biket⁵⁰

3.3.3.3. Qafiyeya Dewlemend

Sê an jî zêdetir deng dema dişibin hevdu û bi heman şiklî tîpên nivîsandin ev wek qafiyeya dewlemend tê binavkirin. Di mewlûda Mela Huseynê Bateyî da ji bo vê cureyê mînak gelek in, em dikarin vê beytê mînak nîşan bidin;

Hat-i Cîbrîl û melaîk Fewcî fewc

Çar kenarê Mekehê bûn mewcî mewc⁵¹

Peyvên “fewc” û “mewc” di nav hevdu de bi qafiye ne. Tîpên “e, w, c” wek ku tê dîtin di dawîya herdu peyvên de dişibin hevdu. Ji ber ku sê tîp dişibin hevdu ew qafiyeya dewlemend e.

3.3.3.4. Qafiyeya Tunç

Peyveke di dawîya risteyê de derbas dibe heke di nav peyveke dawîya risteyeke din de jî derbas bibe ev deng dişibin hevdu ku jê ra dibêjin qafiyeya tunç. Ev wek cureyeke qafiyeya dewlemend tê qebûlkirin. Ev beytên Bateyî ji bo vê mînak in;

Destegîr û mustexasê herdu kewn

Bo gunehkaran penah û pişt û ‘ewn’⁵²

Di dawîya van beytan de peyvên “kewn” û “ewn” qafiyeyê derdixin holê. Di risteya ewil de peyva “**kewn**” hatiye bi kar anîn, di risteya duyem de jî tîpa “k” yê ketiye peyveke nû ya ku gelekî nêzîkî wê “**ewn**” hatiye nivîsandin.

3.3.4. Asonans (Ahenga Dengdêran)

Heke di berhemên edebî de ji heman dengdêran (a, ê, î, o, û, e, i, u) yek an jî çend heb her tim li dû hev bîr dubarekirin, ji ber vê dubarekirinê di vegotinê de ahengek çêbibe û melodiyek derdikeve holê ku ev wek asonans (ahenga dengdaran) tê binavkirin.

Merheba ey geştêyê behra heqîq

Merheba ey dîdeyê ehlê terîq⁵³

⁴⁹ Sadînî, *Mela Huseynê Bateyî Jiyan, Berhem û Helbestên Wî*, 182.

⁵⁰ Sadînî, *Mela Huseynê Bateyî Jiyan, Berhem û Helbestên Wî*, 179.

⁵¹ Sadînî, *Mela Huseynê Bateyî Jiyan, Berhem û Helbestên Wî*, 204.

⁵² Sadînî, *Mela Huseynê Bateyî Jiyan, Berhem û Helbestên Wî*, 177.

⁵³ Sadînî, *Mela Huseynê Bateyî Jiyan, Berhem û Helbestên Wî*, 206.

Di vê beyta Bateyî de tîpa “e”yê 13 caran hatiye dubarekirin ku dema beyt tê xwendin ahengek derdikeve holê, balê dikşîne li ser xwe û gotin xurttir dibe.

3.3.5. Alîterasyon (Ahenga Dengdaran)

Alîterasyon ji bo hevahengiyê dubarekirina heman dengan e.⁵⁴ Di helbestan de dema heman dengdar tê dubarekirin ahengek derdikeve holê ku ji vê re dibêjin alîterasyon. Hin caran di serê peyvan de, hin caran di nav peyvan de û hin caran jî di dawiya peyvan de tê bikaranîn. Dubarekirina tîpan û dengan dibe sedema melodyekê û gotin xweştir dibe.

Dê çikem ya Reb meded mîrê mezin

Wa Muhammed rohnîya çavê di min⁵⁵

Melayê Bateyî di vê beytê de dema behsa Hz. Mihemed dike tîpa “m” yê 7 caran dubare dike ku ev tîpa dengdar jî ji bo alîterasyonê dikare bibe mînak.

3.3.6. Nîda

Nîda hunerek vegotinê ye ku di edebiyatê de gelek caran derdikeve pêşberî xwîneran. Nîda ji bo gazîkirin û bangkirina kesekî an jî tiştekî tê bikaranîn. Hest û kelecana xurt bi saya nîdayê tê vegotin û gelemperî baneşanên hêy, ey, ax, wax, eywax, lo, lê nîşaneyên nîdayê ne. Di vê hunerê de li hember muxatabek, kesek heye ku ew tê hezkirin an jî gilî û gazîn jê tê kirin. Nîda di edebiyata klasîk de ji bo ahengê hêmaneke girîng e ku Melayê Bateyî jî di mewlûdê de bi kar anîye;

Ey şivanê kûdeka zîba delêr

Xwezya wî berxê ji dîdara te têr⁵⁶

Di vê mînaka li jor hatiye dayîn de baneşîna “Ey”, di vê mînaka duyem a ku li jêrê hatiye dayîn de jî baneşîna “Ya” nîda ne. Herdu jî li hember muxatabê xwe kelecane nîşan didin û gotinê xurt dikin.

Ya Resûlellah! Resûlê îns û cin

Ya şefî‘ê sedrê dîwana/eywana mezin⁵⁷

3.3.7. Cotpeyv

Di peysaziyê de heke du peyvên ji hêla mene an jî deng ve dişibin hev, du peyvên wek hevdu yan jî du peyvên li dijî hevdu dema li dû hev bîr rêzkirin peyveke nû ya ku meneya wê cuda derdikeve holê û ji vê re dibêjin cotpeyv. Hin caran du navdêr, hin caran du rengdêr, hin caran du hoker û hin caran jî du lêker dibin cotpeyv û peyveke nû derdixin holê. Gelemperî du peyv ji bo cotpeyvê tên bikaranîn. Hin caran ji du peyvan zêdetir peyv jî dikarin bibin cotpeyv. Armanca cotpeyvan ewe ku hêza vegotinê xurt û dewlemend bibe, di vegotinê de ahengek derkeve holê. Di mewlûdê de ji bo cotpeyvan gelek mînak hene ku ji van hinek ev peyv in; xal û xet, têr û tijî, pak û temîz, behr û ber, dext û dan, bejn û bal, ezman û dev, roj û şev. Mînak;

⁵⁴ M. Zahir Ertekin, *Mewlûda Mele Eliyê Baqûstanî Metn û Lêkolîn*, Çapa Yekem (Hewlêr: Destnivîsxaneya Zanîngeha Soran, 2017), 39.

⁵⁵ Sadînî, *Mela Huseynê Bateyî Jiyan, Berhem û Helbestên Wî*, 219.

⁵⁶ Sadînî, *Mela Huseynê Bateyî Jiyan, Berhem û Helbestên Wî*, 222.

⁵⁷ Sadînî, *Mela Huseynê Bateyî Jiyan, Berhem û Helbestên Wî*, 233.

Ey hetîm û ey herem pak û temîz

Bo te hate bejin û balayê ‘ezîz⁵⁸

Asîmanê bêstûn, wî kir bedîd

Suretê ba xal û xet wî aferîd⁵⁹

ENCAM

Mela Huseynê Bateyî ji ber ku cara ewil bi zimanê kurdî mewlûdek nivîsandiye, di edebiyata klasîk a kurdî de xwedî cihekî taybet e. Ev mevlûd bûye sedem ku kurd êdî bi zimanê xwe mewlûdê bixwînin. Piştî mewlûda wî nivîsîna mewlûdên kurdî jî dest pê kiriye. Yê ku mewlûda Melayê Bateyî ji xwe re wek çavkanî hilbijartine gelemperî xweser tevnegeriyane, ketine bin tesîra uslûb û vegotina wî. Ji ber vê ye kesên din di nav kurdan de qasî wî bi nav û deng nebûne. Di medreseyan kurdan de piştî hînkirina Qur’anê perwerdeya mewlûda kurdî jî hatiye dayîn û ev kevneşopî hê jî dewam dike.

Mewlûd bi uslûbeke didaktîk hatiye nivîsandin, ji ber vê ye ku zêdetir hatiye xwendin û jîberkirin. Bateyî di mewlûdê de hunerên edebî yê wek îstîqaq, tekrîr, îstifham, nîda, tezaad, asonans û h.w.d bi kar anîye ku pesnê pêxember bi vî awayî xurttir û geştir bide. Bikaranîna van hunerên edebî û cureyan qaffiyeyê ya di mewlûdê de helbestvaniya wî nîşan dide. Dema mewlûd serî heta dawiyê bê xwendin wê bê dîtin ku uslûbeke têrhuner û dewlemend heye. Herî dawîn mirov dikare bibêje Melayê Bateyî bi mewlûda xwe ya ku him ji hêla ziman, huner û vegotina edebî û him jî ji hêla uslûb û şêwaza xwe ya xweser ve di dîroka edebiyata klasîk de navê xwe daye nivîsandin. Mohra wî ya taybet li ser edebiyata kurdî bi zelalî xuya dike û navê wî her tim wê bê bibîranîn.

ÇAVKANÎ

Adak, Abdurrahman. *Destpêka Edebiyata Kurdî Ya Klasîk*. Çapa Sêyem. Stenbol: Weşanên Nûbihar, 2015.

Adak, Abdurrahman. “Destnivîsên Mewlûda Melayê Bateyî Di Arşîva A. Jaba De: Nasandin û Analîz”. *The Journal Of Mesopotamian Studies* 2/2, (Havîn: 2017): 1-29.

Agitoğlu, Nurullah. “Molla Hüseyin Bâteyî’nin Şiirlerindeki Hadisler Üzerine Bazı Değerlendirmeler”. *Uluslararası Beytuşşebap Ve Molla Hüseyin Bateyî Sempozyumu Bildirileri (Şırnak, 20-21 Eylül 2014)*. Ed. İbrahim Baz. 119-128. İstanbul: Şırnak Üniversitesi Yayınları, 2015.

Altun, Erman. *Türk Halk Edebiyatına Giriş*. Stenbol: Kitapevi, 2004.

Cebecioğlu, Ethem. *Tasavvuf Terimleri ve Deyimleri Sözlüğü*. Ankara: Ağaç Kitapevi Yayınları, 2009.

Doğru, Rabia. “Kara Vâiz ve Mevlid’i”. *Ondokuz Mayıs Üniversitesi İlahiyat Fakültesi Dergisi* 0/39 (2015): 221-250.

⁵⁸ Sadî, Mela Huseynê Bateyî Jiyan, Berhem û Helbestên Wî, 227.

⁵⁹ Sadî, Mela Huseynê Bateyî Jiyan, Berhem û Helbestên Wî, 175.

Ekinci, Ramazan. “Behîştî Mahlaslı Şairlere Ait Mevlitler, Behîştî Ahmed Sinan’ın Mevlid-i Şerîfî”. *Sufî Araştırmaları Dergisi* 5/10 (Yaz 2014): 17-79.

Eroğlu, Süleyman. “Edebî Bir Tür Olarak Mevlitler-Şekil Özelliklerine Göre Bazı Değerlendirmeler”, *U.Ü. Fen Edebiyat Fakültesi Dergisi* 11/18 (2010): 126-127.

Ertekin, M. Zahir-Nurettin Ertekin. “Kurtedîroka Mewlûdnameyên Kurdî”. *Şarkiyat ICSS’17 Uluslararası Sosyal Bilimler Kongresi/International Congress of Social Science (Diyarbakır, 14-17 Eylül 2017)*. Ed. Mehmet Bilen. 149- 155. Diyarbakır: Şarkiyat Vakfı, 2017.

Ertekin, M. Zahir. *Mewlûda Mele Eliyê Baqûstanî Metn û Lêkolîn*. Çapa Yekem. Hewlêr: Destnivîsxaneya Zanîngeha Soran, 2017.

Ertekin, M. Zahir. “Pesn û Wesfên Hz. Pêxember (s.x.l.) Di Mewlûda Melayê Bateyî De”. *1. Uluslararası Zap Havzası Uleması Sempozyumu Bildirileri (Hakkari, 26-29 Nisan 2018)*. Ed.Yaşar Kaplan-Murat Adıyaman-Emin Yıldırım. 753-770. İstanbul: Hakkari Üniversitesi Yayınları, 2018.

Îlhan, Zîver. *Mewlûda Mela Huseynê Bateyî Metnê Rexneyî û Lêkolîn*. Çapa Yekem. Stenbol: Weşanxaneya Avesta, 2016.

Karacan, Hasan-Aykut, Nurettin. “Mele Hüseyinê Bateyî’nin Mewlid-i Nebî Adlı Eseri İle Mele Süleyman Kurşun’un Mewlida Pêxember Adlı Eserinin Karşılaştırılması”. *Bingöl Üniversitesi Yaşayan Diller Enstitüsü Dergisi* 1/2 (Kasım 2015): 123-141

Kartal, Ahmet. “Türk Edebiyatında Belâgat Çalışmaları Ve "Tezâd" ve "Telmîh" Sanatlarına Eleştirel Bir Bakış”. *Ç.Ü. Sosyal Bilimler Enstitüsü Dergisi* 16/1 (Haziran 2007): 413-428.

Sadinî, M. Xalid. *Mela Huseynê Bateyî Jiyan, Berhem û Helbestên Wî*. Çapa Yekem. Stenbol: Weşanên Nûbihar, 2010.

Sadinî, M. Xalid. “Mela Hüseyînê Bateyî, Jîyan û Berhemên Wî”, *Uluslararası Beytüşşebap Ve Molla Hüseyin Bateyî Sempozyumu Bildirileri (Şırnak, 20-21 Eylül 2014)*, Ed. İbrahim Baz. 83-102 İstanbul: Şırnak Üniversitesi Yayınları, 2015.

Selçuk, Bahir. “Divan Şiirindeki Ses Ve Ahenkle İlgili Sanatlara Genel Bir Bakış”, *Adıyaman Üniversitesi Ulusal Eski Türk Edebiyatı Sempozyumu (Adıyaman, 15-16 Mayıs 2009)*. Ed. Süleyman Çaldak- İbrahim Halil Tuğluk. 483- 491. Ankara: Adıyaman Üniversitesi Yayınları, 2010.

Qanatê, Kurdo. *Tarîxa Edebiyata Kurdî*. Çapa Yekemîn. Diyarbekir: Weşanên Lîs, 2010.

Yıldırım, Kadri. *Ehmedê Xanî Mem û Zîn Çeviri ve Kavramsal Tahlili*. Çapa Duyem. Stenbol: Weşanên Avesta, 2013.

Türk Dil Kurumu. “Türk Dil Kurumu Sözlükleri”. Pêgehîn: 22yê Adarê 2018. <https://sozluk.gov.tr/?kelime>